



Ұлыс оң болсын, Қазақ елі!

Аялаймын сені, Қызылорда!

ҚҰТТЫҚТАУ



Ақмешіт

20 наурыз
сенбі

№22 (1724)

2021 жыл

апталығы

Газет
1994 жылдың 15 сәуірінен
бастап шығады

Қалалық қоғамдық-саяси әлеуметтік-
ақпараттық тарихи-танымдық газет

E-mail: akmeshit.kz@mail.ru

САРАПТАМА

СЫРДЫҢ БОЙЫНА ҚАНДАЙ АҒАШ ЕККЕН ЖӨН?

Сұлу Сырдың бас қаласы – Қызылорда жыл санап құлпырып келеді. Әсіресе, жаз айында қала аумағында егілген көшеттер мен гүлдер бүршік атып, шаһар шырайы тұрғындар көңілін көтеретіні анық. Бұл – көркейтуді көгалдандыру жұмысының жемісі. Ал биыл жер тоңы жібіген көктемнің алғаш айында Сыр орталығына қанша ағаш отырғызылады? Жергілікті климатқа қандай тал егу тиімді? Науқанда нендей қателік кетіп жүр? Осы сауалдарға жауап іздеп көрелік.



ӨТКЕН ЖЫЛЫ БІТКЕН ІС

Бұрын қала аумағындағы көркі кетіп, жабайы өсімдік басқан шаңды алқап, бүгінде қызылордалықтар тамсана сипаттайтын әсем мекенге айналуда. Жаз болса Абай мен Назарбаев даңғылдары бойындағы, сонымен қатар аллея, скверлер аумағына егілген катарантус, филозит, целозия, пеларгония, цинния секілді гүл дәстелері шаһар шырайын келтіріп, айналаға жұпарын шашады. Оған қоса Тұңғыш Президент саябағына отырғызылған ақ терек, көк терек, Сыр талы және Абай даңғылына егілген көрнекі гүлдер мен көшеттер қалаға ерекше сән беретіні байқалады.

Жалпы «Сыр өңірінде ағаш аз» деген таптауының теріске шыққанына көп болды. Жыл сайын жаңадан бой көтерген саябақтар мен демалыс орындарында мыңдаған көшет егіліп, көгал отырғызу жүргізіледі. Мысалы, қала орталығындағы Батырхан Шөкенов атындағы саябақтың өзінде 800 терек пен 80 түп шырша егілген. Ал 2020 жылы «Сыр-Ана» монументі аумағының 3150 шаршы метріне көгалдандыру жұмысы жүргізіліп, «Дәрігерлер» аллеясы мен «Денсаулық» саябағы ашылды.

3 бетте

Ардақты ағайын!

Ел халқының ырыс-ынтымағы мен іргесі сәгілмес бірлігінің арқасында бұл қиын кезеңнен де сүрінбей өтіп, дәстүрлі мерекемізді дәріптеп, кең көлемде атап өтетін күнге де жетерімізге сенім мол. Ұлыстың ұлы күнінде айтылған барлық тілек қабыл болып, жыл басы баршаңызға ырыс-несібе, құт-береке, мол табыс әкелсін! Шанырақтарыңызға шаттық пен қуаныш, жаңуларыңызға жылылық сыйласын. Ұлыс оң, ақ мол болсын!

Ізгі ниетпен,
Қызылорда қаласының
әкімі Нұрлыбек
НӘЛІБАЕВ

ҚАЗАҚТЫҢ ТЕКЕМЕТІ КЕРЕМЕТ ҚОЙ...

Ұлттық өнердің бірі – киіз басу. Халқымыз әу бастан-ақ, әрбір тұтынған бұйымның қадір-қасиетін тани білген. Бұл күні әрі киім, әрі төсеніш, маңыздысы денсаулыққа пайдалы тұрмыстық бұйымды тұтыну кенжелеп тұр. Дегенмен ұлт өнерін заманауи үлгіде қайта жаңғыртып жүргендер бар. Соның бірі – Назарбаев зияткерлік мектебінің бейнелеу өнері пәнінің мұғалімі Қуаныш Үркінбаев.



3 бетте

КЕЙІНГІ ҰРПАҚ ҰМЫТПАСА ЕКЕН...

Киіз үй – халқымыздың ең алғашқы сәулеттік құрылысы. Бұрынсыз үй қыста да, жазда да өмір сүруге қолайлы. Жылжымалы үйде әп-сәтте көшіп-қонуға болады. Оның жалпы салмағы жабдықтарымен қосқанда 300-400 келі. Кезінде киіз үйді бір түйеге артып, жана қонысқа көшкен. Қалаға қарасты Белкөл кентінде Мәрзия Құлмышова есімді әжей тұрады. Жасы алшыстың асқарынан асқан асқаулықты ана көздің жауын алатын жасауымен жасақталған киіз үйді жалға беріп, кәсіп көзі етіп отырғанына жиырма жылға жуық уақыт өтіпті. Ұлттық болмыстың иісі аңқитын құндылықты көздің қарашығындай сақтап отырған оның сарайында бүгінде барлығы 6 киіз үйінің тіресіп жинаулы тұр. Ал үйінің

бір бөлмесі құлды бір тігін шеберханасындай. Себебі кейуана киіз үй жабдықтары мен жасауының барлығын дерлік осында өзі тігеді екен. Кестелейді, тоқиды, сан түрлі оюмен өрнектеп, әйтеуір, небір кереметті әп-сәтте әзірлеп шығады.

3 бетте



НАУРЫЗ НАҚЫШТАРЫ

Әз-Наурызды асыға күттік

Биыл көпшілік наурыз мерекесін асыға күтіп жүр. Соның бірі – қаланың жас тұрғыны Аслан Нұржанұлы. «Тәте, білесіз бе, мен наурызды қатты сағым» деген бағдалы сөзі құлағыма жағып кетті. Әдетте, кішкентайлар бұл мейрамға асықпайтын еді. Маған інімнің сөзі қызықты көрініп, қайта сұрадым:

– Аслантай, наурызды неге сонша күттің? – дедім тағырқай.
– Тәте, былтырғыдай үйде отырып тойлағым келмейді. Көп адам ауырып, мейрамды дұрыс тойлай алмай қалдық қой. Ешкім ауырмаса екен, – деген кезде көзіме еріксіз жас келді. Ойын баласы арманын жасырмады, ашық айтты. «Шіркін, сенің айтқаның болсын. Ешкім ауырмасын» деген күйі қалдым. Иә, расында да былтырғы сәт қайталанбаса дейміз. Алла амандығын беріп, бәрі Ұлыстың ұлы күнін аман-есен, мәз-мейрам күйде атап өткенге не жетсін...

Дүйім жұрт күткендей бұл – көктемнің, жылылықтың, бірліктің, татулықтың, еңбектің, ізгіліктің, бақыттың мерекесі. Осы күні жақсы тілек тілеу, құттықтау, кешірім жасау, табысу сияқты адамгершілік қасиеттер көрініс тауып, кейінгі ұрпақтар сондай жақсы өнегеден үлгі алады. Наурыздың айрықша тәлім-тәрбиелік, үлгі-өнегелік, сән-салтанаттық, мәрт-жомарттық, қадір-қасиеттілік нышан-белгілері мен таным-ұғымдарының үлгі түрлері өте көп. Оның бәрі әр адамды жоғары саналылыққа, әдептілікке, өнегелілікке, бауырмалдыққа, көрегенділікке, ізеттілік пен мейірім-шапағатқа баурайды. Наурызды әр халықтың асыға күтетіні де осыдан болса керек. Осы ұлы күнге байланысты халықтың әдет-ғұрыптары мен жол-жоралары, салт-дәстүрлері бар.

НАУРЫЗ – БІРІНШІ АЙ

Наурыз – жаңа жыл тойы, көктем мерекесі, күн мен түннің теңелу сәті, халықтың ынтымақ күні. Сонымен қатар наурыз – табиғаттың мейрамы. Өйткені Орта Азия мен Қазақстан тұрғындары бұл күнді «Самарқанның көк тасы еріген күні» деп те дәріптейді. Наурыз – қазаққа бірінші айдың аты. Адамдар бір-бірінің қатесін кешіріп, татуласады, оның аяғы ойын-сауық, ән-жырға жалғасады. Халықта бұл күнге лайық салт-дәстүрлер де бар. Олар «Наурыз тойы», «Наурыз жыры», «Наурыз көже», «Наурыз бата» деп аталады.

Наурыз халықтық мереке бола тұра кеңестік саясат кезінде оны тойлауға діни мейрам есебінде тыйым салынды. Бірақ осы тұста Мағжан Жұмабаевтың мына сөзі еске түседі: «Қазақтың наурызы – дін мейрамы емес, тұрмыс мейрамы, шаруашылық мейрамы» деген. 1988 жылдан бастап Наурыз мейрамы қайта тойлана бастады және ол барлық жерде кең қолдау тауып, халықты рухына жағынған байытты.

Наурыз – шығыс күн есебі бойынша жылдың алғашқы айы. Григориан күн есебінде де, жылдың алғашқы айы есебінде де күн мен түннің ұзақтығы теңеледі. Сол себеппен наурыз жыл басы болып саналған. Сонымен бірге қыстың соңы, көктемнің басы. Күн жылынып, қар еріп, жыл құстары келе бастайды. Сондықтан жылдың күт мезгілі есебінде наурызға бүкіл халық аса құрметпен қарап, оны есте қаларлық қасиетті ай санаудың басы етіп алған.

НАУРЫЗ ТӨЛ МЕН НАУРЫЗ КӨК

Көктемнің шуақты сәті наурыз айында мал төлдей бастайды. Осы наурыз төлін төлбасы ретінде бағалап, малжанды қазақ баласы оны ерекше күтіп-бағалай. Төлбасы сатылмайды, ешкімге сыйға берілмейді. Мұндай малды қобіне өз қызық, тойына немесе құрбандыққа жаратып, ырым етеді.

Наурыз көк – осы айда ұшып келетін көктем құсы. Көк бояуы басым шағын ғана қаракөк құс. Осы құсты шығыс халқы ерекше құрметтейді. Оны алғаш көргендер «Наурызқоғым, келдің бе?» деп шақырады. Наурызкөкті ешкім үркітпейді, оны киелі құс қатарына қосады.

НАУРЫЗШЕШЕК ПЕН НАУРЫЗША

Табиғаттың тағы бір сыйы – наурыз айында өсетін жапырақты, түрлі-түсті гүлді, қауашақты әсем өсімдік. Әсемдік үшін үйде өсіріледі. Майының дәрілік қасиеті бар. Қазақ елінің таулы аймағында оның бірнеше түрі өседі. Наурызшешек «Қызыл кітапқа» енген сирек кездесетін бағалы өсімдік қатарына жатады.

Наурыз айының ашық күндері қолдан ойғандай ерекше ою-өрнекті әрі жұп-жұқа қиыршық қар түседі. Ол күн көзіне шағылысып, шашырап, жылтылдап құбылады. Анықтап қарағанда басқа қар қиыршықтарындай емес, жеңіл де үлгірек болады. Мұны халық «наурызша» деп атаған.

2 бетте

АУЫЛДАҒЫ НАУРЫЗ ТОЙЫ

Биыл Тәуелсіздігіміздің 30 жылымен тұспа-тұс келіп отырған Наурыз мерекесін ауылдық округтерде де ерекше атап өтуде. Қалаға қарасты Қарауылтөбе ауылдық округі Қызылорданың 20-25 шақырым жерде орналасқан. Бүгінде 400 – ден астам шаңырақ үйі тату-тәтті ғұмыр кешіп жатқан, қаймағы бұзылмаған ауыл. Халқы – еңбексүйер, мад, егін шаруашылығымен айналысады. Мұнда Наурыз жылда жоғары деңгейде өтеді. Ауылда мектеп, балабақша, медпункт бар. Әбір үйге ауызсу, табиғи газ тартылған. Жолы тегіс. Қарауылтөбеліктердің халқы ұйымшыл. Той-томалақ пен таудай тірлікті біріге атқарып тастайды.

2 бетте



